



PLEIV EVANGELICA REFORMADA
EVANGELISCH REF. KIRCHGEMEINDE
CASTRISCH/RIEIN/SEVGEIN



Cars con cristians

En nossas pleivs dat ei dabia activitads. Ei dat purschidas per giuvens e vegls. Nus havein constatau che quellas purschidas ein buca enconuschentas a tuts. Oravontut tier las occurenzas che sedrezzan ad autras gruppas da vegliadetgna che a l'atgna, fan savens damondas, speculaziuns e per part era explicaziuns fallidas la curella. Quei ha motivau nus, las suprastonzas dalla pleiv evangelica reformada e dalla pleiv roman-catolica, da crear in feagl che duei informar davart nossa «veta religiosa».



Nos plevons e las suprastonzas vulan dar fuorma a moda activa alla cardientscha cristiana en nossas pleivs. La baselgia duei esser in liug nua ch'ins sa endriescher Diu communabla-mein, nua ch'ins astga emprender d'enconuscher Diu e nua ch'ins astga anflar plascher e cunfiert.

Naven da lur naschienschan san ils affons crescer si el ravugl dalla cardientscha cristiana. Entras il batten confirman ils geniturs l'entrada en ina da nossas baselgias e sedeclaran ensem cun lur affon tiel cristianissem.

El decuors da lur svilup duein ils affons haver la pussevkladad da schar madirar lur maletg da Diu e da Jesus.

En la vegliadetgna da 0–6 onns vegnan ils affons envidai en accumpignament d'in carschiu (pil pli in dils geniturs) als **survetschs divins ecumens per affons pigns**. En fuorma da giug vegn raquintau en baselgia historias ord la Bibla ni ch'ei vegn discutau auters temas. Ei vegn cantau ed urau. Ils affons san aschia resentir la religun cristiana e far atgnas experientschas cun Diu.

Integrai ell'instrucziun ecumena da scola ein era **survetschs divins da scolars**. Quels vegnan preparai dils scolasts da religun e dils plevons ensemen cun ils scolars. Cheutras emprendan ils affons d'enconuscher meglier il mintgadi cristian. Lur maletg da Diu e da Jesus vegn cheutras cumpletaus e semadirescha.





Survetschs divins da famiglia porschan allas famiglias cun affons la pussevliadad da frequentar e festivar communablaimein survetschs divins. Ils affons han cheutras la pussevliadad da separticipar ad in survetsch divin sco ils carschi e tuttina da capir il messadi da Jesus Kristus.

L'emprema s. communiun e la creisma ein fiastas dalla baselgia catolica. La preparaziun leutier ha liug per part enteifer e per part ordeifer l'instrucziun da scola. A quella caschun dueien ils affons buca sulettamein vegnir preparai sin il di da fiasta, els san era sviluppar lur agen maletg da Diu.

La **confirmaziun** munta ella baselgia evangelica reformada la conclusiun digl entruidament ecclesiastic. Ils scolars s'occupeschan ordeifer il temps da scola cun damondas dalla veta e dalla cardientscha e vegnan preparai per la confirmaziun. Els dueien anflar lur cardientscha persunala tier Diu.

Survetschs divins per juvenils vegnan concepì specialmein per juvenils e festivi a moda pli «moderna». Ils interess, basegns e las damondas specificas da quella gruppa da vegliadetgna duein haver plaz en baselgia. Diu e la baselgia san aschia esser ina part ella veta dils juvenils.



Survetschs divins, messas ed occurenzas specialas han liug regularmein en omisduas pleivs. Leutier s'audan era ils survetschs divins ecumens, en special era il **di** ed il **suntermiezdi per ils seniors**. Quellas occurenzas ein drizzadas a tuts ed envidan da separticipar a moda activa alla veta ecclesiastica. En nossas pleivs vegn buca mo purtau da cuminonza legria e tristezza, mobein tuts dueien crescher e dar communablaimein perdetga da nossa cardientscha.

Nus sperein che nus e nos affons astgien emprender d'enconuscher meglier Diu entras festivar quels survetschs divins, e che nus, affons e carschi, sappien contribuir comunablaimein ad ina veta ecclesiastica activa, orientada viers gl'avegnir. Lein sperar che nos affons, formai da lur atgnas experientschas religiosas, vegnien in di a dar vinavon a lur affons la cardientscha cul messadi dalla carezia da Diu.

